



اسم المائة: فصل في فضائل الصلاة ٢

من سلسلة: شرح مختصر منهاج القاصدين

لفضيلة الشيخ: محمد حسين يعقوب

مائة

Way2allah.com



إنتاج فريق التفريغ بشبكة الطريق إلى الله



اسم المادة: فصل في فضائل الصلاة ٢  
من سلسلة: شرح مختصر منهاج القاصدين  
لفضيلة الشيخ: محمد حسين يعقوب

رابط المادة: <https://way2allah.com/khotab-item-1878.htm>

أعوذ بالله من الشيطان الرجيم

بسم الله الرحمن الرحيم

الحمد لله رب العالمين والصلاة والسلام على أشرف المرسلين سيدنا محمد وعلى آله وصحبه أجمعين.

أما بعد؛

فإخوتي في الله أحبكم في الله. أسأل الله أن يرزقني وإياكم الإخلاص في القول والعمل وأن يعافينا وإياكم من البلاء كله وأن ينجينا وإياكم من الفتن ما ظهر منها وما بطن.

اللهم ارزقنا حسن الخاتمة، والجنة بغير حساب ولا سابقة عذاب، وارزقنا اللهم رفع الدرجة في الجنة مع النبي محمد -صلى الله عليه وسلم- في الفردوس الأعلى.

إخوتي في الله:

من دروس مختصر منهاج القاصدين، وتوقفنا فيه على أسرار الصلاة وكان المعنى الأول حضور القلب، واتفقنا أن تمضي جمعتك السابقة في مجاهدة قلبك للحضور أثناء الصلاة. وقلنا إن معناه أن يفرغ القلب من غير ما هو ملابس له، ليتنا نستطيع أن ننفذ هذا في حياتنا ككل، أن يصبح الهم واحدًا أثناء العمل، بمعنى أنك حين تعمل شيئًا فاجعل قلبك فيما أنت فيه، ولا تنشغل فيكون جسمك في مكان وقلبك في مكان ثاني، ليتنا نتعلم هذه المجاهدة.

الشاهد

### حضور القلب

يقول الشيخ: "وسبب ذلك لك الهمة" الهمة، يقول: "فإنه متى أهملك أمرٌ حضر قلبك ضرورةً متى أهملك أمر حضر قلبك ضرورة، زي ما بيقلوا بمنتهى البساطة: لو أن إنسانًا بين فكي سبع؛ يفكر في إيه؟ يعني هو شايف أسد داخل عليه هياكله، ممكن في اللحظة دي يفكر هو هياكل إيه؟ ولا يشرب إيه؟ ولا هينام إمتي؟ لا، ده كل تفكيره منحصر إزاي يتصرف معاه. يبقى هو ده. هم الحاضر الوقت، هي دي القضية إن يبقى همك حاضر في اللي أنت فيه.

قال: "فإنه متى أهلك أمر حضر قلبك ضرورة، فلا علاج لإحضاره إلا صرف المهمة إلى الصلاة، وانصراف المهمة يقوى ويضعف بحسب قوة الإيمان" هو أنا إزاي أقدر يبقى كل همي في الصلاة؟ قوة إيماني برينا، قوة إيماني بالعمل اللي أنا فيه، ليه؟ لأن أنا لو إيماني ضعيف يبقى خوفي على الرزق وعمل حساب لزوجتي، ومراعاة ولادي كل ده شاغلني، لكن لو إيماني برينا قوي، إيماني برينا تام، فإن هذا الإيمان القوي، الإيمان التام يقول أني أتوكل على الله وسيكفيني كل هذه الأمور، كل هذه الأمور ولا حاجة أنا مع ربنا، هي دي قوة الإيمان التي تدفع إلى حضور القلب الحضور التام.

قال: "وانصراف المهمة يقوى ويضعف بحسب قوة الإيمان بالآخرة واحتقار الدنيا. فمتى رأيت قلبك لا يحضر في الصلاة فاعلم أن سببه ضعف الإيمان فاجتهد في تقويته" قوي إيمانك يحضر قلبك.

كده أجبنا لك على كل الأسئلة اللي شاغلة بالك إزاي أدفع الوسوسة اللي في الصلاة؟ إزاي أدفع السرحان اللي في الصلاة؟ قوي إيمانك. إزاي أقوي إيماني؟ الإيمان يزيد وينقص يزيد بالطاعات وينقص بالمعاصي. صلي لك في اليوم مائتين ثلاثمائة ركعة، صم أد شهر متواصل، قوي إيمانك صل في اليوم مائة مائتين ثلاثمائة ركعة، صم شهر ولا شهرين ولا ثلاثة ولا أربعة متواصل تظفر الجمع بس فيه، هذه القضايا هي التي تزيد الإيمان. قبل الصلاة تصدق بصدقة، اقعده استغفر لك شوية، جاهد في الوضوء وإحسانه، هذه الأمور تزيد الإيمان وتساعد في حضور القلب في الصلاة.

### المعنى الثاني: التفهم لمعنى الكلام

أول حاجة حضور القلب. اتنين إنك تفهم أنت بتقول إيه.

لأن القلب ربما كان حاضرًا مع اللفظ دون المعنى، فينبغي صرف الذهن إلى إدراك المعنى. عايزك تفهم وأنت بتقول في الصلاة بسم الله الرحمن الرحيم يعني إيه بسم الله، بسم الله والرحمن والرحيم؟ مع التفهم لمعنى الكلام معنى الكلام، وأنت راعك سبحان ربي العظيم يعني إيه سبحان ربي والعظيم؟

سبح قدوس رب الملائكة والروح تفهم معناها، سبحان ذي الجبروت والملكوت والكبرياء والعظمة تفهم معناها، فهم الكلام؛ التفهم لمعنى الكلام هذا أمر وراء حضور القلب، ينبغي صرف الذهن إلى إدراك المعنى لأن صرف الذهن لإدراك المعنى يدفع الخواطر الشاغلة ويقطع موادها، فإن المواد إذا لم تنقطع لم تنصرف الخواطر عنها.

يبقى آدي نوع تاني أو محاولة تانية أو سبب تاني لدفع الوسوس والسرحان بإيه؟ إنك إنت تفكر في اللي إنت بتقوله، تفكر في الآيات اللي بتقراها. كثير في الصلاة بعد ما نخلص صلاة أقول آية من اللي صلينا بيها وأسأل أخ من اللي قاعدين في الصلاة آخر مرة سمعت الآية دي إمتي؟ مش معنا. ليه؟ لأنه مش حاضر قلبه في الصلاة بيفكر في الآيات اللي بيسمعها، لو بيفكر فيها أول ما أسأله عليها يقول سمعناها في الصلاة دلوقتي.

من عجيب إن سألت واحد مرة اهدنا الصراط المستقيم آخر مرة سمعتها إمتي؟ بعد صلاة العشاء على طول قال سمعتها كثير بس مش فاكرو آخر مرة إمتي. اهدنا الصراط المستقيم في الفاتحة لسه سامعها في الصلاة مرتين في الركعتين الجهرية وقايلها مرتين في الركعتين السرية. يبقى التفهم لمعنى الكلام

"فإن المواد إذا لم تنقطع لم تنصرف الخواطر عنها، والمواد إما ظاهرة: وهي ما يشغل السمع والبصر، وإما باطنة: وهي أشد كمن تشعبت به الهموم في أودية الدنيا، فإنه لا ينحصر فكره في فن واحد ولم يغنه غض البصر، لأن ما وقع في القلب كاف في الاشتغال به".

يبقى القضية مش الأسباب الظاهرة بس، لا الحاجات اللي بتشغل السمع والبصر الظاهرة الأصعب منها الباطنة؛ اللي بتشغل القلب. والرسول -صلى الله عليه وسلم- أمرنا بقطع الشواغل الظاهرة والباطنة قبل الصلاة، فجعل وأوجب على الإنسان أن يصلي إلى ستره "إذا صَلَّى أَحَدُكُمْ إِلَى سِتْرَةٍ فَلْيَدْنُ مِنْهَا لَا يَقْطَعِ الشَّيْطَانُ صَلَاتَهُ"<sup>١</sup> يبقى بيصلي لستره، ويقرب منها، يبقى قريب من السترة. قَامَ رَسُولُ اللَّهِ صَلَّى اللَّهُ عَلَيْهِ وَسَلَّمَ يُصَلِّي فِي حَمِيصَةٍ ذَاتِ أَعْلَامٍ، فَتَنَظَرَ إِلَى عِلْمِهَا، فَلَمَّا قَضَى صَلَاتَهُ قَالَ: اذْهَبُوا بِهَذِهِ الْحَمِيصَةِ إِلَى أَبِي جَهْمِ بْنِ حُدَيْفَةَ، وَاتَّبُونِي بِأَنْبِجَانِيهِ، فَإِنَّمَا أَهْتَنِي آتِفًا فِي صَلَاتِي<sup>٢</sup>.  
صلى مرة إلى قرام لعائشة فيه تصاوير قال: "أَمِطِي عَنَّا قِرَامَكَ هَذَا؛ فَإِنَّهُ لَا تَزَالُ تَصَاوِيرُهُ تُعْرَضُ لِي فِي صَلَاتِي"<sup>٣</sup>. يبقى لازم نحافظ على الأمر ده، إن متبقاش فيه شواغل ظاهرة، مفيش شواغل قدامنا شغلانا عن الصلاة، والشواغل الباطنة.

من الشواغل الظاهرة كذلك إن يبقى فيه عيال بيلعبوا، إن يبقى فيه زوجة راحة جاية، إن يبقى فيه تلفزيون ولا راديو شغال، ولا كاسيت شغال، إن يبقى فيه أي حاجة شاغلة. بل قال رسول الله صل الله عليه وسلم "لا صلاة بحضرة طعام، ولا وهو يدافعه الأخبثان"<sup>٤</sup> يبقى الإنسان ميصليش والأكل موضوع، دماغه في الأكل، ولا وهو يدافع الأخبثان عايز يتبول أو عايز يتبرز، ماينفesch كل دي، قاطع الشواغل؛ قاطع الشواغل الظاهرة أضف إلى ذلك قاطع الشواغل الباطنة.

اسمع الشيخ يقول إيه: "وعلاج ذلك إن كان من المواد الظاهرة، بقطع ما يشغل السمع والبصر، وهو القرب من القبلة والنظر إلى موضع السجود، والاحتراز في الصلاة من المواضع المنقوشة، وألا يترك عنده ما يشغل حسه، فإن النبي -صلى الله عليه وآله وسلم- لما صلى في خميسة لها أعلام نزعها وقال إنما أهتني آتفا عن صلاتي" الحديث متفق عليه

"وإذا كان من المواد الباطنة" المشكلة بقى الكبيرة المشاغل الباطنة اللي من جوه؛ الهموم والمشاغل القلبية نعمل إيه؟ قال: "فطريق علاجه أن يرد النفس قهراً إلى ما يقرأ في الصلاة ويشغلها به عن غيره".

عجبتني أوي منه دي كأن قال اللي أنا بدور عليه؛ رد النفس قهراً، كان نفسي أقولها من زمان للعيال اللي بيشتكوا الفتور، حمل النفس قهراً على العمل. عاملين لنا مشكلة فيه عندي فتور أعمل إيه؟ اعمل. تعمل إيه؟! اشتغل. تعمل إيه؟ اجتهد. تعمل إيه؟ جاهد، اتحرك. هو ده اللي إنت تعمله، لكن طيب عايزيني أنا أعملك إيه؟

"رد النفس قهراً إلى ما يقرأ في الصلاة" أرغم نفسك. إحنا محتاجين إن إحنا فعلاً ننتصر على أنفسنا، انتصار حقيقي يبقى في انتصار قتلناكوا إن ممكن واحد يقوم ليلة في الصلاة رب إني مغلوب فانتصر، رب إني مغلوب -لنفسى يعنى- فانتصر -يعنى انتصر لي من نفسى- انصري على نفسى، وتففضل طول الليل كده وانت مستحضر بس؛ شهواتك ونفسك، رب إني مغلوب فانتصر، رب إني مغلوب فانتصر، رب إني مغلوب فانتصر، طول الليل. عشان محتاجين فعلاً، حقيقةً، واقعاً، ننتصر على أنفسنا اللي خلاص غلبتنا واستولت علينا، وإحنا عايشين دلوقتي في قهر أنفسنا وسلطانها للأسف الشديد. أنفسنا عمالة تقول لنا يمين شمال وستودي بك إلى الهلاك، لذلك ربنا -سبحانه وتعالى- يقول: "وَأَمَّا مَنْ خَافَ مَقَامَ رَبِّهِ وَهَيَّ النَّفْسَ عَنِ الْهَوَىٰ \* فَإِنَّ الْجَنَّةَ هِيَ الْمَأْوَىٰ" النزاعات: ٤٠-٤١ يبقى لابد من الانتصار من النفس.

<sup>١</sup> أخرجه أبو داود والنسائي وأحمد

<sup>٢</sup> أخرجه البخاري ومسلم

<sup>٣</sup> صححه الألباني

<sup>٤</sup> صححه الألباني

اسمع الكلمة دي جميلة جدًا ومتنسهاش أبدًا طريق علاج الوسواس والخواطر والمشاكل والسرحة في الصلاة، أن ترد النفس قهراً إلى ما تقرأ في الصلاة واشغلها به عن غيره إزاي؟ شوف الشيخ يقول إيه: "ويستعد لذلك قبل الدخول في الصلاة، بأن يقضي أشغاله، ويجتهد في تفرغ قلبه، ويجدد على نفسه ذكر الآخرة، وخطر القيام بين يدي الله، وهو المطلاع" ادبجها، نفسك اقتلها، خلص عليها قبل ما تدخل الصلاة، "فإن لم تسكن الأفكار بذلك فليعلم أنه إنما يتفكر فيما أهمه واشتهاه فليترك تلك الشهوات وليقطع تلك العلائق، واعلم أن العلة متى تمكنت لا ينفعها إلا الدواء القوي، والعلة إذا قويت جاذبت المصلي وجاذبها إلى أن تنقضي الصلاة في المجاذبة، ومثل ذلك كمثل رجل تحت شجرة أراد أن يصفو له فكره، فكانت أصوات العصافير تشوش عليه، وفي يده خشبة يطيرها بها، فما يستقر فكره حتى تعود العصافير فيشتغل بها فقيل له هذا شيء لا ينقطع، فإذا أردت الخلاص فاقطع الشجرة، فكذلك شجرة الشهوة إذا علت وتفرقت أغصانها وانجذبت إليها الأفكار كانجذاب العصافير إلى الأشجار، والذباب إلى الأقدار، ذهب العمر النفيس في دفع ما لا يندفع وسبب هذه الشهوة التي توجب هذه الأفكار حب الدنيا" كلام زي الفل

قالك الموضوع إن الشهوة أو العلة إذا تمكنت تحتاج دواء قوي، ولكن العلة إذا قويت لا ينجح فيها الدواء، يظل الإنسان في الصلاة أعوذ بالله من الشيطان الرجيم ويستحضر قلبه تروح راجعة تاني، أعوذ بالله من الشيطان الرجيم ويدخل في الصلاة ويبدأ يركز في الصلاة تروح راجعة تاني، ويفضل الصلاة كلها عمال إيه؟ يدفع وتيجي، ويدفع وتيجي، ويدفع وتيجي، تضعي الصلاة في شد وجذب، نعمل إيه؟ قالك الموضوع زي واحد قاعد تحت شجرة وعازب يركز كده ويفكر، كل ما يركز ويبدأ يفكر عصافير وس وس وس إيه الدوشة دي؟ يقوم ماسك عصاية وينش العصافير، نش العصافير ويقعد، مجرد ما يقعد شوية ويفكر تروح العصافير جاية تاني، قالوله مش هنخلص. طيب يا جماعة الحل إيه عازب أركز؟ قالوله اقطع الشجرة. يبقى الحل نعمل إيه؟ اقطع الشجرة. نفس الشيء إنت بتدافع تفكيرك في القلوس وفي الزوجة وفي العيال دي شجرة فروعها كثير، وآدام فيه شجرة وفيه فروع يبقى لازم فيه عصافير، آدام فيه قاذورات يبقى لازم فيه ذباب، أعمل إيه؟ اقطع الشجرة إيه الشجرة؟ حب الدنيا

عشان كده النبي متصلي عليه -صلى الله عليه وسلم- قالها لك في كلمة بس احنا كل ده بنحوم حواين الكلمة اللي قالها اللي هي إيه "صلّ صلاة مودع" واحد بيصلي ركعتين وداخل يعمل عملية -اللهم اشف كل مريض مسلم وعاف كل مبتل مسلم اللهم اشف مرضانا ومرضى المسلمين يا حي يا قيوم- واحد داخل بيصلي ركعتين وداخل يعمل عملية قد يموت فيها نسبة النجاح في العملية مفيش، يبقى مركز وهو في الصلاة دي بيفكر في إيه؟ هي دي، "صلّ صلاة مودع".

فاقطع حب الدنيا يسلم قلبك. قيل لعامر بن عبد قيس رحمه هل تحدثك نفسك بشيء من أمور الدنيا في الصلاة؟ قال لأن تختلف الأسنة في أحب إلي من أن أجد هذا" قالوله نفسك بتحدثك وإنت في الصلاة بحاجة؟ قال: لو أتقطع حنت بلاش أتقطع حنت دي عشان بتعملنا مشاكل، ها لو أنا السيوف تدخل جوايا "لأن تختلف في الأسنة" سيوف ورماح ونبال وسهام تدخل جوايا، أحب إلي من إن أنا أسرح في الصلاة، شفت تعظيم الأمر ده؟ اتعلمتها من شيخي برضه زمان -سبحان الله العظيم- زمان دي من عشرين لا أكثر من عشرين من خمسة وعشرين سنة كده قول، إن الشيخ قالي يابني إنت في الرفع من الركوع بتطول أوي أنا خايف الواحد والعباد بالله يسرح، والعباد بالله؟ دا الموضوع عنده مش وارد مش إنه يسرح، فخايف لما الواحد يطول "سمع الله لمن حمده، ربنا ولك الحمد حمدا دائما طيبا مباركا فيه، ملء السماوات وملء الأرض وملء ما بينهما وملء ما شئت من شيء بعد، أحق ما قال العبد وكلنا لك عبد، اللهم لا مانع لما أعطيت، ولا معطي لما منعت، ولا ينفع ذا الجند منك الجند." هو خلص وسكت فيقولي أنا خايف بعد ما خلصت والعباد بالله أسرح. والعباد بالله يعني أسرح دي مصيبة كبيرة زي كلمة عامر بن عبد قيس كده؛ أسرح في الصلاة ليه؟ لا، ده أنا يعني أموت وما أسرحش في الصلاة.

يقول الشيخ "واعلم أن قطع حب الدنيا من القلب أمر صعب وزواله بالكيفية عزيز" صعب مش سهل "فليقع الاجتهاد في الممكن منه" يبقى نجتهد على أد ما نقدر والله الموفق والمعين".

إحنا قلنا المعنى الأول إيه؟ حضور القلب  
المعنى الثاني كان إيه؟ التفهم لمعنى الكلام

### المعنى الثالث: التعظيم لله والهيبة

من زمان والله يا ناس وأنا نفسي فعلا ومنى عيني أتكلم عن عظمة ربنا. فعلا الناس مبيعظموش ربنا كما ينبغي، تعظيم ربنا في القلوب مش مش قوي للأسف الشديد. فعلا محتاجين كلام عن عظمة ربنا بس الواحد خايف، مهما اتكلمنا برضه مش هنقول عن عظمة ربنا كما ينبغي كما يجب ربنا ويرضى.

الشاهد

محتاجين نستشعر الهيبة، الهيبة، تعظيم ربنا ويبقى فيه هيبة في دخول الصلاة. الشيخ يقول إيه يقول: "وتعظيم الله يتولد من شئين؛ معرفة جلال الله -تعالى- وعظمتته، ومعرفة حقارة النفس وأنها مستعبدة، فيتولد من المعرفتين الاستكانة والخشوع" فيتولد من المعرفتين الاستكانة والخشوع آه

الأول تعرف إنت مين

إنت مين؟ ولا حاجة، شوية مغص يخلوك تتمرغ في الأرض، شوية صداع يخلوك ولا حاجة، ظالم من ظلمة الدنيا يتسلط عليك يذل أنفاسك. إنت مين؟ ولا حاجة. سبحان الله العظيم

قلتلكوا إن المعنى ده خطر لي وأنا في الطائرة. وأنا في الطائرة مسافر على ارتفاع أربعين ألف قدم لا مش أوي كده ده وهي نازله، واحد بص من الطائرة للناس والطيارة نازلة خالص خالص كده فشاف الناس أد إيه؟ ده بالعكس مش طيارة ولا حاجة دا إنت لو في عمارة عالية شوية شوف الناس أد كده رمل رمل، سبحان الملك سبحان الملك قل لا إله إلا الله يا أخي والله المثل الأعلى في السماوات والأرض "لَيْسَ كَمِثْلِهِ شَيْءٌ وَهُوَ السَّمِيعُ الْبَصِيرُ" الشورى: ١١

يبقى ربنا -سبحانه وتعالى- في استوائه على عرشه بعظمتته وجلاله؛ البشر دول إيه بقى؟ إنت إيه؟ إنت إيه يا بني؟ إنت إيه؟ والله حصل كده برضه يوم عرفه، واحد وقف كده وبص كل الناس دول بيقولوا لبيك. إنت إيه في وسط الناس دول، ثلاثة مليون؟ فما بالك بقى لم تقول ألف ومائتين مليون مسلم ولا ألف وخمسمائة مليون مسلم، إنت إيه؟ معرفتك بنفسك دي، تبقى حقير حقير إنت إنسان حقير، حقارة النفس دي ومعرفة عظمة الله، يتولد منهم الهيبة والتعظيم.

كثير من الناس أو بعض الناس بينسى نفسه، بيفكر نفسه حاجة. إنت إيه؟ وإنت مين؟ لما المهلب بن أبي صفرة مر على واحد من السلف ويمشي في ثوب له بيتبختر، فقال له اتق الله هذه مشية يبغضها الله -عز وجل-. فقال له: أأنت تعرفني؟ قال: بلى، أعرفك. قاله إنت مش عارف أنا مين ولا إيه؟ قال: بلى أعرفك، أولك نطفة قدرة، وآخرك جيفة مذرة، وأنت بينهما تحمل العذرة. إنت مين؟ أقولك آه إنت مين.

إنت مين؟

كيف يتكبر من خرج من مجرى البول مرتين؟ كيف يتكبر من بطنه خرا؟ دا كلام السلف

تتكبر على إبه ده شوية مرض يخلوك ملكش لازمة في الدنيا دي، ومن غير مرض ملكش لازمة في الدنيا دي.

### معرفة عظمة الله

الله، عشان كده إن شاء الله هندرس العقيدة من خلال أسماء الله الحسنى هو ده حلها الوحيد. ربنا يعلمنا وينفعنا إن شاء الله. التعظيم لله والهيبه يتولد من شيتين؛ معرفة جلال الله وعظمته، ومعرفة حقارة النفس، وأنها مستعبدة، فيتولد من المعرفتين الاستكانة والخشوع ومن ذلك الرجاء فإنه زائد على الخوف فكم من معظم ملكا يهابه خوف سطوته كما يرجو بره، والمصلي ينبغي أن يكون راجيا بصلاته الثواب كما يخاف من تقصيره العقاب.

لا دا معنى بقى عايز قعدة. موضوع الرجاء؛ وإن إحنا نصلي بحب ورجاء مش بس خوف.

تعظيم الهيبه حب، عشان كده شفت بعض المشايخ بيبكي في آيات وصف الجنة وذكر الجنة أكثر من آيات العذاب والنار والتخويف. إن شاء الله لعلني أنقل لكم في المرة الجاية بإذن الله كلام ابن القيم في وصف صلاة المقربين إزاي الآيات تنقله ما بين الحب والخوف والرجاء أسأل الله أن يثبتنا وإياكم على الإيمان

ويعافينا وإياكم من البلاء وينجنا وإياكم من الفتن ويرزقنا وإياكم الإخلاص في القول والعمل  
أحبكم في الله

وصلى الله وسلم وبارك على النبي محمد وآله وصحبه

والحمد لله رب العالمين

والسلام عليكم ورحمة الله